

## Scheierbombeler unn Dracheboot

Wie isch mich neilich meddem Schorsch soiner Fraa, dem Kättche, uff de Gass unnerhalle habb, doo seetse: Wenn merr su monsche Flerschemer Werrder heern dut, doo waaß enn Oigebloggde odder aach enn junge Mensch nitt, was gemoond ist, weil die Werrder missverständlich sinn.

Wie moonsden dess?, habb isch gefroochd.

Unn donn hotts Kättche verzählt: Ei gugge mol dess Wort Scheierbombeler. Wie isch dess Wort verwend habb, hott mich moin grüße Enkel Kevin gefroochd: Oma, was ist ein ‚Scheierbombeler‘? Awwer bevor isch Ontwort gewwe konnt riefderr: Ich weiß es. Es ist einer, der sich in einer Scheune aufgehängt hat!

Du dust ze vill Krimis gugge, gell, hotts Kättche doodruffhieh dem Kevin gesaad, naa, dess isses nitt. Scheierbombeler saache merr zu dene Blädder vunn de Tuwaksplonnse, die innere Scheier ferrs Trockene uffgehengd werrn.

Da soll einer draufkommen, seet de Kevin, gibt’s noch mehr solcher Worte in der Flörsheimer Mundart, die missverständlich sind?

Dess Kättche hott enn Aacheblig noochgedenkd, donn seetse: Aaschgeisch iss su e Wort.

Aha, moont de Kevin, das ist bestimmt ein Cello.

Ess Kättche war gons baff: Wie kimmsden doo druff?

Doo seet de Kevin: Geisch ist Geige, und Arsch, na ja, weil man die Geige im Sitzen spielt, also ein Cello.

Dess Kättche hott doodruffhie laut gelachd unn gesaad: Naa, e Aaschgeisch iss enn unliebsame Mensch. Unn waaßde, was iss, wenn ooner die Gaasegischdern krieh?

De Kevin musst nitt long noochdenke. Die Gaasegischdern? Gaas ist Geiß, also Ziege, und Gischdern ist bestimmt eine Krankheit, also heißt Gaasegischdern die Gicht einer Geiß? Oder sogar die Krankheit Ziegenpeter?

Dess Kättche hott noch mieh gelachd. Naa, wenn isch die Gaasegischdern kriehe, donn bin isch iwwer ebbes zimmlisch uffgereeschd. Unn jetz dess nächste Wort: Nonneferrzjer.

Jetzt hott de Kevin gelachd. Das versteh ich, weil ich weiß, was eine Nonne ist, und das Wort Ferrzjer kenne ich von dir. Das Wort ist halt, na ja, ein wenig anrühig.

Dess Kättche hott die Schnut verzooche. Was du widder denke dust. Naa, Nonneferrzjer sinn e Gebäck, dess iss dess, was aach Schokoladina haaße dut. Unn jetz noch oons: Quetschkommod.

Doo hott de Kevin noch mieh gelachd. Das weiß ich, was das ist, Oma, so ein Ding steht in deinem Wohnzimmer: Eine Kommode, bei der ich mir immer die Finger quetsche, wenn ich die Schublade schließe.

Dess Kättche druff: Naa, e Quetschkommod iss e Akkordeon. Ja, Kevin, su monsch e Wort in unserm Flerschemerisch iss schunn e bissi missverständlich.

De Kevin hott gegrinsd. Oma, ich weiß auch ein Wort, das missverständlich ist.

Dess Kättche hott gons schebb geguggd. Unn was iss dess ferr e Wort?

Doo hott de Kevin noch mieh gegrinsd: Drachenboot!

Dess konnts Kättche nitt verstiehe unn frächt: Unn warum iss dess Wort missverständlich?

Jetzt war de Kevin gons ernst. Weil im Drachenboot ja manchmal auch Männer sitzen.